

Oraanga Kerititiano e te Angaanga Orometua—Au Manako ke Mai

ME 6-12

AU MEA UMERE I ROTO I TE PIPIRIA | 2 KORINETIA 4-6

“Kare Atura Matou i Roiroi”

(2 Korinetia 4:16) I kore ei matou i roiroi; mate ua rai oki te tangata i vao nei, te akaouia nei te tangata i roto, i tera rā i tera rā.

w04 8/15 25 ¶16-17

Roiroi Kare ra i Akaroiroi

¹⁶ Te akono anga i to tatou oraanga i te pae vaerua, e tika oki e, e puapinga maata tikai. Me rauka ia tatou tetai pirianga waitata tikai ma te Atua ko lehova, penei ka roiroi tatou i te pae kopapa, kareka ra kare rava tatou e akaroiroi i te akamori anga iaia. Ko lehova oki teia “te oronga nei aia i te maroiroi no tei [“roiroi,” NW]; e te akamaata nei aia i te maroiroi no tei apikepike.” (Isaia 40:28, 29) Te apote-toro ko Paulo, tei kite uorai i te tika tikai o teia au tuatua nei, kua tata e: “Kore ei matou i roiroi; mate ua rai oki te tangata i vao nei, te akaouia nei te tangata i roto, i tera rā i tera rā.”—2 Korinetia 4:16.

¹⁷ Akara ana i te tuatua “i tera rā i tera rā.” Te tamanako maira teia i te tuku ua anga ia tatou uorai ki ta lehova e oronga ua maira i te au ra tataki tai. Tetai mitinari tei tavini tiratiratu no te 43 mataiti, kua aro atu i te au tuatau o te roiroi e te akamaroiroi kore i te pae kopapa. Inara kare aia i akaroiroi. Kua karanga aia: “Kua akariro au ei angaanga matau i te tu vave i mua ake ka akamata ai i tetai angaanga, kia rauka iaku i te akapou i tetai taime i te pure kia lehova e te tatau i tana Tuatua. Teia angaanga matau i te ra ravarai kua tauturu iaku i te akakoromaki e teia noa ai.” Ka rauka tikai ia tatou i te irinaki ki to lehova mana akamaroiroi me putuputu, ae “i tera rā i tera rā,” i te

pure kiaia e te manakonako no runga i tona au tu teitei e tana au taputou.

(2 Korinetia 4:17) To tatou oki mate mea ngiti poto māmā i teianei, te akatupu nei ia i te kakā maata rava teimaa mutu kore no tatou.

(2 Korinetia 4:18) Tatou oki e akono nei, eiaa i te au mea i akaraia ra, i to au mea akara koreia ra: ko te au mea e akaraia nei oki, no teia ua nei ia tuatau; kareka te au mea akara koreia ra, e tika ia i te vai ranga.

Kimi i te Mārama o te Tuatua Mou

(2 Korinetia 4:7) Te āriki nei ra matou i taua apinga nei i te āriki karakaraea nei, kia riro te mana maata meitaki nei ki te Atua, au-raka ia matou.

(2 Korinetia 6:13) E kia pera katoa mai kotou ia matou, (te karanga atu nei au mei te mea e e tamariki kotou naku,) kia maora katoa oki kotou.

w09 11/15 21 ¶17

Kia Tupu ua Rai i Roto i te Aroa Taeake

⁷ Akapeea ra tatou? Akapeea tatou me ‘akamaora atu’ i te akaari anga i te aroa taeake? Penei e mea matauia no te au tangata tataki tai aiteite ua te mataiti me kore te turanga o te oraanga i te akaari i te aroa ki tetai e tetai. E e kapiti putuputu ua ana te aronga aiteite ua to ratou inangaro i te tamataoraanga. Me kare tatou e akaari ana i te inangaro ki tetai ke mei ta tatou e akaari ra ki tetai au Kerititiano, ka anoanoia tatou ‘kia akamaora atu.’ E meitaki i te ui kia tatou uorai: ‘E iti ua ainei toku taime e piri atu ana ki te angaanga orometua me kore ki te au angaanga a te katoatoa ma te au taeake e te au tuaine i vao ake i toku pupu oa? I ko i te Are Uipaanga Patireia, e kotinga ana ainei au i toku taime i te piri atu ki te aronga

ou tei kapitii mai, no te mea te irinaki ra au e kia tauta pakari ratou kia rauka mai tetai piri-anga kiaku? Te aravei ra ainei au i te aronga pakarikari e te au mapu i roto i te putuputu-anga?’

Tatau Pipiria

(2 Korinetia 4:1-15) E teiane tei ia matou mai nei teiane taoonga, e ko matou oki i aroaia mai, kare atura matou i roiroi. ² Kua akaruke ra matou i te au peu munangaro akama ra, e kare oki to matou i te aerenga pakari, kare oki i pikikaa i te rave anga i te tuatua a te Atua, te akameitaki nei ra matou ia matou uaorai i te akava-ngakau o te tangata ravarai, i te akakite anga atu i te tuatua-mou i mua i te aroaro o te Atua. ³ E teiane te arai katoaia nei ta matou evangelia, i araiia ia i te aronga e ta ia ratou uaorai: ⁴ Koia te aronga i akapoiriia to ratou ngakau akarongo kore e te atua o teiane ao ra, kia kore te mārama o te evangelia kakā o te Mesia, ko te tutu o te Atua ra, kia kakā mai i roto ia ratou. ⁵ Kare oki matou i tuatua aere ia matou uaorai, i te Mesia ra ia lesu i te Atu; e ko matou uaorai nei, ei tavinii ia no kotou ia lesu ra. ⁶ Ko te Atua oki, ko tei akaue i te mārama kia kakā mai no roto i te pōiri ra, ko tei kakā mai ia i roto i to tatou ngakau, kia rauka te mārama ra o te kite i te kakā o te Atua i te mata o lesu Mesia ra. ⁷ Te āriki nei ra matou i taua apinga nei i te āriki karakaraea nei, kia riro te mana maata meitaki nei ki te Atua, auraka ia matou. ⁸ Kua kako matou i te mate, kare ra i apiapi: kua pekapeka matou, kare ra i ope te manakoanga: ⁹ Kua takinga-kinoia, kare ra i akarukeia: kua uriia ki raro kare ra i mate rava: ¹⁰ I te apai aere anga i te mate o te Atu ra o lesu i to matou nei kopapa, kare e tivata, kia kitea katoaia te ora anga o lesu i to matou nei kopapa. ¹¹ E no lesu nei oki, te

tuku uaia nei rai matou e ora nei no te mate, kare e tivata, kia kitea to lesu ra ora anga i to matou nei au kopapa mate ua. ¹² E teiane ko te mate tei tupu ia matou nei, ko te ora ra tei tupu ia kotou na. ¹³ No te mea ra tei ia matou katoa taua ngakau akarongo ra, mei tei tataia ra e, “Kua akarongo au, no reira au i tuatua’i;” kua akarongo katoa matou, i tuatua’i matou nei: ¹⁴ Kua kite oki matou e, na tei akatu i te Atu ra ia lesu, e akatu katoa mai ia matou i te rima o lesu, ka tuku atu ei ia matou e ia kotou katoa. ¹⁵ No kotou oki te au mea katoa nei, kia kakā te Atua i taua aroa maata maringi ua ra, i te akameitaki a te tangata e manganui ra.

ME 13-19

AU MEA UMERE I ROTO I TE PIPIRIA | 2 KORINETIA 7-10

“Ta Tatou Angaanga Tauturu”

(2 Korinetia 8:1-3) E teiane, e aku au taeake, e akakite atu matou ia kotou i te aroa ua o te Atua i orongaia mai i te au ekalesia i Makedonia nei: ² E kua maringi ua to ratou rekareka, maata ua rai to ratou putaua, e te mate maata, i te maata o to ratou oronga. ³ Ko au oki te kite e, ko ratou uaorai tei inangaro i te oronga i tei tika ia ratou ra, e e maata atu rai:

w98 11/1 25 ¶1

“Ko te Tangata e Oronga ma te Rekareka”

Te mea mua, kua akakite a Paulo kia Korinetia no runga ia Makedonia, e akaraanga tau to ratou no te angaanga tauturu ra. “E kua maringi ua to ratou rekareka,” i tata ei a Paulo, “maata ua rai to ratou putaua, e te mate maata, i te maata o to ratou oronga.” Kare i anoanoia to Makedonia e kia aruaruia ra. Tei tuke, kua tuatua a Paulo e “te tuatua raurau anga mai ia matou e rave i taua apinga ra, e ei ia matou katoa te tuku atu i taua apinga ra

i te aronga tapu ra.” E mea umere tikai te tu oronga rekareka anga o to Makedonia ra me akamanako tatou e “maata ua rai to ratou putaua.”—2 Korinetia 8:2-4.

(2 Korinetia 8:4) E te tuatua raurau anga mai ia matou e rave i taua apinga ra, e ei ia matou katoa te tuku atu i taua apinga ra i te aronga tapu ra.

(2 Korinetia 9:7) E oronga te tangata rava-rai i tana i akakoro i roto i tona ngakau; eiaa ma te noinoi, e mei te mea e no te umuumu: ko te tangata oronga ma te rekareka ta te Atua e inangaro.

Kimi i te Mārama o te Tuatua Mou

(2 Korinetia 9:15) E teiane, kia akameitakiia te Atua i tona oronga kare e tika kia tuatua ra.

w16.01 9 ¶2

Kia Akakeuia Tatou e ta te Atua i “Oronga Kare e Tika Kia Tuatua”

² Kua kite a Paulo e e akapapuanga to Iesu atinga e ka akatupu te Atua i tana au mea katoa i taputou mai. **(E tataua ia 2 Korinetia 1:20.)** Tera te aiteanga, ko ta te Atua i “oronga kare e tika kia tuatua,” ka kapiti mai te atinga o Iesu e te au mea meitaki pouroa e te aroa tiratiratu ta Iehova e akaari maira kia tatou. E mea ngatā i te akamārama i teia apinga aroa kia mārama meitaki tatou. Eaa toou manako no runga i teia apinga aroa? Akapeea teia apinga aroa i te akakeu anga ia tatou kia akapapa meitaki no te Akamaaraanga i to Karaiti matenga a te Ruitoru, rā 23 o Mati, 2016?

(2 Korinetia 10:17) “Ko tei akatietie ra, kia akatietie aia i te Atua.”

Tatau Pipiria

(2 Korinetia 7:1-12) E teiane, e aku au aka-perepere e, tei ia tatou taua au meitaki i tuatuaia maira, e tamā ua tatou ia tatou

uaorai i te au viivii katoa o te kopapa e te vaerua, ma te akaope marie i te akonoanga tapu i te matakū anga atu i te Atua. ² E āriki mai ia matou; kare rava a matou tangata i takinga-kino, kare rava a matou tangata i akakino, kare rava a matou tangata i piki-kaa. ³ Kare ra e ei akaapa i karanga atu ei au ia kotou i teiane tuatua; kua karanga atu oki au i muatangana, e tei roto kotou i to matou ngakau i te mate katoa anga e te ora katoa anga atu. ⁴ Te matakū kore ua nei taku tuatua ia kotou, e paapaa maata taku ia kotou: kua maata toku pumaana, kua maata rava toku rekareka i to matou au mate katoa nei. ⁵ Ia matou oki i tae ki Makedonia ra, kare rava e akaangaro anga o to matou kopapa, kua kako matou i te mate; e tamaki anga to vao, e matakū oki to roto. ⁶ Na te Atua ra, ko te akapumaana i te aronga akaaka ra, i akapumaana mai ia matou i te aere anga mai o Tito ra; ⁷ Kare oki no tona aere anga mai anake ra, i te pumaana ra i pumaana’i aia ia kotou, ka akakite mai ei aia ia matou i te rai o to kotou anoano, to kotou aue, e te inangaro maata o to kotou ngakau iaku nei; i maata’i toku rekareka. ⁸ I akaaue ana au ia kotou i taku leta na, kare au i tataraara i teiane, i tataraara ana ra au i muatangana; te kite nei oki au e, e tuatau poto ua to kotou aue anga i taua leta ra. ⁹ Te mareka nei au, kare ra no te mea i akatupu au i to kotou aue, no te mea ra i aue kotou ma te tataraara: i tau oki to kotou aue i te Atua, kia kore rava kotou e kino ia matou. ¹⁰ Ko te aue oki e tau i te Atua ra, e akatupu ia i te mate. ¹¹ Ka akara na oki i taua mea nei rai, i te mea i tau to kotou aue i te Atua ra ko te akono meitaki oki ta te reira i akatupu i roto ia kotou na, e te akatika ia kotou uaorai, e te kinokino, e te matakū, e te anoano maata tikai, e te maroiroi, e te tutaki! Kua akakite ua mai kotou e kare o kotou viivii i taua mea

nei. ¹² E teiane i tata ua au i te tuatua ia kotou, kare ua to taua tangata i rave i te kino ra i pera'i au, kare katoa to tei takinga-kinoia ra, ei akakite anga atura ia kotou i to matou akono meitaki anga atu ia kotou i mua i te aroaro o te Atua ra.

ME 20-26

AU MEA UMERE I ROTO I TE PIPIRIA | 2 KORINETIA 11-13

“To Paulo ‘Tara i Roto i te Kopapa’”

(2 Korinetia 12:7) E kia kore au e teitei rava i te maata o tei akakiteia mai iaku ra, i tukua mai tetai tara i roto i taku kopapa nei, e karere na Satani ei pāpā mai iaku, kia kore au e teitei maata roa.

w08 6/15 3-4

Kia Maroiroi Noatu te au tu Paruparu

Kua pati tetai tavini akarongo mou kia lehova e kia akaatea i te ‘tara i roto i te kopapa,’ e manamanata tei tupu putuputu mai. E toru taime te pati akatenga anga te apotetoro ko Paulo ki te Atua kia akaatea i teia timataanga mei iaia. Noatu e eaa te reira, mei tetai tara tamanamanata ra, kua akakore te reira i to Paulo mataora i te tavini anga ia lehova. Kua akaaite a Paulo i te reira ki te papa putuputua anga. Kua pau maira a lehova e: “Toku nei aroa ua, oti ra ua ia taau: ei te apikepika e taka meitaki rava'i toku maroiroi.” Kare a lehova i akaatea ana i taua tara i roto i te kopapa. Kia akakoromaki ua a Paulo i te reira, inara kua tuatua mai aia e: “Kia paruparu oki au ra, te maroiroi ra au i reira.” (2 Kori. 12:7-10) Eaa te aiteanga o tana tuatua?

(2 Korinetia 12:8, 9) E e toru oki aku pati anga atu i te Atua i taua mea ra, kia akataka keia iaku. ⁹ Kua tuatua maira ra aia, Toku nei aroa ua, oti ra ua ia taau: ei te apikepika e taka meitaki rava'i toku maroiroi. E teiane,

e mea rekareka ia iaku kia akatietie i toku nei paruparu, kia vai marie te maroiroi o te Mesia i runga iaku nei.

w06 12/15 24 ¶17-18

Te Oronga Nei a lehova i te ‘Vaerua Tapu ki te Aronga e Pati Atu Kiaia Ra’

¹⁷ Ei pauanga ki te au pure a Paulo, kua karanga te Atua kiaia: “Kua tuatua maira ra aia, Toku nei aroa ua, oti ra ua ia taau: ei te apikepika e taka meitaki rava'i toku maroiroi.” Kua karanga a Paulo: “E teiane, e mea rekareka ia iaku kia akatietie i toku nei paruparu, kia vai marie te maroiroi o te Mesia i runga iaku nei [“mei tetai puakapa rai,” NW].” (2 Korinetia 12:9; Salamo 147:5) No reira, kua kite mai a Paulo na roto ia Karaiti, e kua ooraia te paruru maroiroi o te Atua ki rungao iaia mei tetai puakapa rai. I teia tuatau, e pau mai ana a lehova i ta tatou au pure na roto i tetai tu aiteite. Kua oora aia i tona paruru mei tetai tapoki rai ki rungao i tona au tavini.

¹⁸ E tika, kare tetai puakapa e tapu ana i te ua mei te topa mai anga me kore te au matangi mei te pupui mai anga, inara e oronga mai ana te reira i tetai paruruanga mei te reira au apinga. Mei te reira katoa, kare te paruruanga tei orongaia mai e “te maroiroi o te Mesia” e tapu ana i te au timataanga mei te tupuanga kia tatou me kore te au taomianga tei tukunaia mai ki runga ia tatou. Inara, te oronga maira te reira i te paruruanga pae vaerua mei te au apinga kino o teiane ao e te au takinokino anga a to te reira arataki, ko Satani. (Apo-kalupo 7:9, 15, 16) No reira, noatu me te akono ra koe i tetai timataanga e kare i ‘akataka keia mei ia koe,’ papu ia koe e te kite ua maira a lehova i taau putotoanga e kua ariu mai aia ki ‘toou reo e maata.’ (Isaia 30:19; 2 Korinetia 1:3, 4) Kua tata a Paulo: “E tuatua-mou ra ta te Atua, e kare aia e vaoo ia kotou kia timataia, mari ra ko te tika ia kotou kia akakoromaki ra; e akatupu katoa aia i te akapuanga i taua

timataanga ra, kia tika ia kotou kia akakoro-maki.”—1 Korinetia 10:13; Philipi 4:6, 7.

(2 Korinetia 12:10) E teiane i mea reka-reka iaku te paruparu, te akakino, te pini, te takinga-kino, e te tumatetenga i te Mesia nei; kia paruparu oki au ra, te maroiroi ra au i reira.

w18.01 5 ¶8-9

“Te Oronga Nei Aia i te Maroiroi no Tei Paruparu”

⁸ E tatau ia Isaia 40:30. Penei e maata to tatou tu karape, inara kua kotingaia te ka rauka ia tatou i te rave i to tatou uarai maroiroi. E apianga teia ka tau tatou katoatoa kia tamou. E maata te au mea ta te apotetoro ko Paulo i rave, inara kare i rauka iaia i te rave i te au mea ravarai tana i inangaro. Kua akakite aia kia lehova i tona manako, karanga mai a lehova kiaia: “Ei te apikepiki e taka meitaki rava’i toku maroiroi.” Mārama meitaki a Paulo i ta lehova i akakite kiaia. Te tumu te reira i karanga ai aia: “Kia paruparu oki au ra, te maroiroi ra au i reira.” (2 Korinetia 12:7-10) Eaa te aiteanga o tana tuatua?

⁹ Kite mai a Paulo e kua kotingaia te ka rauka iaia uarai i te rave. Kua anoano aia i te tau-turu mei ko mai i tetai tei ririnui atu. Ka rauka i te vaerua tapu o te Atua i te oronga i te ririnui kia Paulo me paruparu aia. E e maata atu ta te reira ka rave. Ka rauka katoa i te vaerua o te Atua i te oronga i te ririnui kia Paulo ei akatupu i te au mea kare e rauka i tona uarai maroiroi i te rave. Ka tupu katoa teia kia tatou. Me oronga mai a lehova i tona vaerua tapu, ka akamaroiroi tikai ia tatou!

Kimi i te Mārama o te Tuatua Mou

(2 Korinetia 12:2-4) Kua kite au i tetai tangata i roto i te Mesia, okotai akenei ngauru mataiti e a ara: (kare au i kite e, i roto i te kopapa, kare oki au i kite e, kare i roto i te kopapa: ko te Atua tei kite;) i apai rava-

ia taua tangata ra ki runga rava i te rangi tua toru ra. ³ Kua kite au i taua tangata ra, (kare au i kite e, i roto i te kopapa, me kare i roto i te kopapa; ko te Atua tei kite;) ⁴ E i apai naia aia ki runga i paradaiso, e kua akarongo i te tuatua, kare e tau kia tuatua, kare oki e tika i te tangata nei kia tuatua.

(2 Korinetia 13:12) E aroa kotou tetai ki tetai i te ongi tapu ra.

Tatau Pipiria

(2 Korinetia 11:1-15) Naringa kotou e akakoromaki iti ua mai na iaku nei i taku nei akatietie neneva nei; koia tikai e akakoromaki mairai kotou iaku. ² Te matakau nei au ia kotou i te matakau Atua: kua momokoia kotou e au i te tane okotai, kia tuku atu au ia kotou ei paretenia viivii kore i te Mesia ra. ³ Te matakau nei ra au, ko te akakinoia aea to kotou ngakau kia kore atu te tavaitai ua e tau i te Mesia nei, mei ta te ovi i piki-kaa atu ia Eva i tona pakari. ⁴ Te tuatua ra taua tangata i aere maira i tetai lesu ke, ko tei kore i tuatuaia e matou ra, e te āriki na kotou i tetai vaerua ke, ko tei kore i ārikiia e kotou ra, e tetai evangelia ke kare i mouria e kotou, akakoromaki tika kotou iaia. ⁵ Te manako nei oki au e kare rava au i iti i te au aposetolo mamaata katoa ra. ⁶ Te kamakura ra au i te tuatua, kare ra au e kamakura i te kite; kua kitea puia ra matou i rotopu ia kotou i taua au mea katoa nei. ⁷ Kua apa aina au i te taakaaka anga iaku uarai, kia teitei kotou; ko au i tuatua ua atu i te evangelia o te Atua ia kotou na? ⁸ Kua pou oki etai au ekalesia iaku i te rave anga i te tutaki, kia tika iaku kia rave i ta kotou angaanga. ⁹ Iaku oki i noo ki o kotou na ka ngere ei au ra, kare rava tetai tangata i teiaa iaku: na te au taeake ra no Makedonia mai i turu mai iaku i taua ngere noku ra: kua matakite marie ei au iaku uarai kare i tivata, kia kore kotou

e teiaa iaku, e ka matakite rai au iaku uao-
rai. ¹⁰ Tei roto iaku nei te tuatua-mou a te
Mesia ra, kare rava e kore teianeī akatietie
iaku nei, i te pa enua i Akaia nei. ¹¹ No te
aa ra? no te mea kare au i aroa ia kotou?
kare, kua kite oki te Atua. ¹² Ko taku ra e
rave nei, e rave rai au, ei akakore atu i te ra-
venga a te aronga i kimi i te ravenga, kia
riro ratou mei ia matou katoa nei i taua mea
ta ratou e akatietie ra. ¹³ E aposetolo piki-
kaa oki te reira, e rave angaanga pikikaa ia,
i te akatutu aposetolo anga na te Mesia ia
ratou uao-rai. ¹⁴ Kare oki e vavaria; ko Satani
oki tei akatutu angela katoa iaia uao-rai no
te mārama. ¹⁵ Kare oki te mea va maata, kia
akatutu tavini tona au tavini no te tuatua-
tika; e akatauia to ratou openga i ta ratou
angaanga.

ME 27-TIUNU 2

AU MEA UMERE I ROTO I TE PIPIRIA | GALATIA 1-3

“Patoi ua Atura au iaia ki Mua i Tona Aro- aro”

(Galatia 2:11-13) Kia tae rā Petero ki Ane-
tioka, patoi ua atura au iaia ki mua i tona
aroaro, no te mea e apa tika tana. ¹² Tetai
aronga ki o lakobo ra kare ratou i tae, te kai
ra aia ma te au etene katoa: kia riro maira
ratou, kotoe ke akera aia, akataka atura iaia
uao-rai, i te matakū i to te peritome. ¹³ Koia
katoa tetai aronga ngati luda kua tapikipiki
ratou ma ia katoa: e riro katoa atura oki a
Banaba i taua pikikaa na ratou ra.

w17.04 25 ¶16

Ka Aru Ainei Koe i to Iehova tu Tika?

¹⁶ **E tataua ia Galatia 2:11-14.** Kua matakū a
Petero i te tangata. (Maseli 29:25) Kua kite a
Petero i to Iehova manako no te aronga ke.
Noatu ra, kua matakū aia i te au Kerititiano
ngati luda peritomeia no Ierusalema mai kare

ratou e reka mai iaia no te kapiti atu ki te au
Kerititiano o te enua ke. Akakite te apotetoro
ko Paulo kia Petero e pikikaa aia. No teaa ra?
No te mea kua rongo a Paulo ia Petero te pa-
ruru anga i te aronga ke i ko i te uipaanga i
Ierusalema i te mataiti 49. (Angaanga 15:12;
Galatia 2:13) Akapeea te au Kerititiano o te
enua ke ta Petero i akariri me ariu atu? Ka tuku
ainei ratou ia ratou uao-rai kia akaturoriia? Ka
ngere ainei a Petero i tana au tuanga anga-
anga no tona tarevake?

(Galatia 2:14) E kite akera au i to ratou
aerenga tika kore i te tuatua-mou o te eva-
ngelia nei, karanga atura au kia Petero ki
mua ia ratou ravarai, Te akono na koe te
ngati luda i ta te etene, kare i ta te ngati
luda, eaa oki koe i māro atu ei ki te etene e
akangati luda?

w13 3/15 5 ¶12

Te Aronga e Inangaro ra ia Iehova, ‘Kare Ratou e Akaturoriia’

¹² Kua matakū a Petero i to tetai ke manako no
runga iaia. Kua vai tiratiratu aia kia Iesu e
Iehova, inara i tetai taime kua akakeu te tu
matakū iaia kia rave i te au tarevake. Ei akara-
anga, e toru taime kua karanga aia e kare aia
i kite ia Iesu. (Luka 22:54-62) I tetai taime ke,
kua manako aia e e meitaki atu tetai pae Ke-
rititiano i tetai atu au Kerititiano. E manako
tarevake to Petero, e penei kua rauka i tetai
pae i roto i te putuputuanga i te aru iaia. No
reira kua ako pakari atu a Paulo ia Petero.
(Gala. 2:11-14) Kua riri ainei a Petero i teia
akoanga e kua akamutu i te oro i roto i te
oro taemoemo anga no te oraanga mutu kore?
Kare. Kua akamanako meitaki aia no runga i ta
Paulo i tuatua, kua tau i tona tu, e kua oro ua
atu aia i roto i te oro taemoemo anga.

Kimi i te Mārama o te Tuatua Mou

(Galatia 2:20) Kua akasatauroia au maua ko
te Mesia: te ora ua nei ra au; kare ra au, te

ora nei te Mesia i roto iaku nei: e toku nei ora anga i roto i te kopapa nei, te ora nei au i te akarongo i te Tamaiti a te Atua, ko tei aroa mai iaku, e kua oronga mai iaia uaorai noku.

w14 9/15 16 ¶20-21

Tavini Tiratiratu i te Atua Noatu te au Timata-anga

²⁰ Akapeea ra me aro atu tatou i te au timataanga te ka akaparuparu ia tatou? Ei akaraanga, akapeea e rauka ai ia tatou te kopae i te manako taitaia? Tetai ravenga meitaki tikai, ko te akamanako oonu anga i te atinga oko o Iesu. Ko ta Paulo te reira i rave. I tetai au taime, kua taitaia aia. Tera ra, kua kite aia e kua mate te Mesia no te aronga ara mei iaia rai, kare e no te aronga apa kore. Kua tata aia e: “Te ora nei au i te akarongo i te Tamaiti a te Atua, ko tei aroa mai **iaku**, e kua oronga mai iaia uaorai **noku**.” (Gala. 2:20) Ae, kua ariki a Paulo i te oko e kua irinaki e kua orongaia te reira nona tikai.

²¹ Ka rauka ia koe te puapinga me ariki katoa koe i te oko ei apinga aroa **naau** tikai, no ko mai ia Iehova. Kare te aiteanga o teia e ka ngaro ke te manako taitaia. Penei ka anoania tetai pae kia akakoromaki i te manako taitaia i tetai au taime e tae ua atu ki te ao ou. Inara, akamaara e: Ka orongaia te tutaki no te aronga kare i tuku i te au. I te au ra ravarai, te waitata atura tatou ki te tuatau ka tae mai ei te Patireia o te Atua. Me tae mai te reira, ka tupu te au i runga i te enua e ka riro te katoa-toa ei aronga apa kore. Tauta ua atu rai kia o atu koe ki roto i te Patireia, noatu e ka na roto koe i te au timataanga e manganui.

(Galatia 3:1) Ko kotou, e to Galatia i te manako kore e, naai kotou i pikikaa io na, i kore ei kotou i akono i te tuatua-mou, tei akakite uaiā Iesu Mesia, mei te mea i akasatauroia ki mua i to kotou mata, i rotopu ia kotou?

Tatau Pipiria

(Galatia 2:11-21) Kia tae rā Petero ki Ane-tioka, patoi ua atura au iaia ki mua i tona aroaro, no te mea e apa tika tana. ¹² Tetai aronga ki o Iakobo ra kare ratou i tae, te kai ra aia ma te au etene katoa: kia riro maira ratou, kotoe ke akera aia, akataka atura iaia uaorai, i te matakū i to te peritome. ¹³ Koia katoa tetai aronga ngati Iuda kua tapikipiki ratou ma ia katoa: e riro katoa atura oki a Banaba i taua pikikaa na ratou ra. ¹⁴ E kite akera au i to ratou aerenga tika kore i te tuatua-mou o te evangelia nei, karanga atura au kia Petero ki mua ia ratou ravarai, Te akono na koe te ngati Iuda i ta te etene, kare i ta te ngati Iuda, eaa oki koe i māro atu ei ki te etene e akangati Iuda? ¹⁵ Ko tatou ko te ngati Iuda anau nei, kare te tangata are no te etene, ¹⁶ Kua kite oki tatou e, kare ua te tangata e tika i te angaanga a te ture, i te akarongo ra ia Iesu Mesia, i akarongo katoa’i tatou ia Iesu Mesia, kia akatikaia i te akarongo i te Mesia, auraka i te angaanga a te ture; kare rava e tangata e tika i te angaanga a te ture. ¹⁷ Te kimi nei tatou kia akatikaia mai e te Mesia ra, e te noo rave ara ua nei rai tatou, ka riro aina te Mesia ei tavini no te ara i reira? Auraka rava iā. ¹⁸ E kia akatu akaou au i taku i akatopa ra, kua akariro au iaku uaorai ei tangata ara. ¹⁹ Ko au ra, no te ture, kua mate iā au i te ture, kia ora au i te Atua. ²⁰ Kua akasatauroia au maua ko te Mesia: te ora ua nei ra au; kare ra au, te ora nei te Mesia i roto iaku nei: e toku nei ora anga i roto i te kopapa nei, te ora nei au i te akarongo i te Tamaiti a te Atua, ko tei aroa mai iaku, e kua oronga mai iaia uaorai noku. ²¹ Kare au i akangere i te aroa ua o te Atua; no te ture te tuatua-tika i akatakaia mai ei ra, e matenga puapinga kore to te Mesia i reira.